

四庫全書

子部

欽定四庫全書

子部

疑耀

目錄

詳校官中書臣張虎拜

員外郎臣牛穎文覆勘

覆校官編修臣潘曾起

校對官原任編修臣勵守謙

詹錄監生臣杜文海

欽定四庫全書

子部十

疑耀

雜家類二 雜考之屬

提要

臣等謹案疑耀七卷舊本題明李贅撰贅有
九正易因己著錄是編前有張萱序稱負笈
數千里修謁其門迺裒一編見示屬以訂正
戊申歲以地官郎分務吳會登梓以傳云云
案贊恃才妄誕敢以邪說誣民所作藏書至

謂母以孔夫子之是非是非我其他著作無一非狂悖之詞而是編考証故實循循有法雖間倡儒佛歸一之說其言亦謹而不肆至云儒不必援佛佛不必援儒又云經典出六朝人潤色非其本真且與贊論相反斷乎不出其手王士禎古夫于亭雜錄云家有疑耀一書凡七卷乃李贊所著而其門人張萱序刻者余嘗疑為萱自纂而嫁名於贊以中數

有校秘閣書及修玉牒等語萱嘗為中書舍人纂文淵閣書目而贊未嘗一官禁近也及觀論溫公一條中云余鄉海忠介益信不疑云云今因士禎之說而考之奉朝請一條云余今將五十矣始為尚書郎是萱官戶部時語贊亦未嘗官六曹也蘭香一條云此法在宋已有之自吾廣始蘇東坡一條云東坡寓吾惠最久文天祥一條云文璧蓋守余惠州

而以城降元者是皆廣東人語與萱之鄉貫
相合贊本閩人無由作此語也知此書確出
於萱士禎所言為不謬蓋以萬曆中勢名最
盛託贊以行而其中刪除不盡者尚有此數
條耳周亮工書影稱贊四書第一評第二評
皆葉不夜所偽撰知當時常有是事也其書
多由記憶而成如文彥博偽帖不知為王照
新志所載石蒼舒事翡翠屑金不知為歐陽

修歸田錄語謂沈約還家問鄉里詎堪持作
夫二語為白居易詩謂左傳巫筮為巫者名
筮皆失之疎舛謂本草稱蠭可療目故陳仲
子耳無聞目無見食蠭李而即愈又謂本草
稱葷鱸作羹下氣止嘔張翰在當時意氣鬱
抑遇事嘔逆故思此味尤穿鑿無理然其他
考証乃往往有依據舊以惡贊之故併屏斥
之過也今改題萱名從其實焉乾隆四十六

年八月恭校上

總纂官臣紀昀臣陸錫熊臣孫毅

總校官臣陸費墀

欽定四庫全書

子部十

疑耀目錄

雜家類二 雜考之屬

卷一

孔子無鬚眉辯

舜有兄妹

生子無功

姣童

誤躬作弓

書籍板行

高皇帝像

許由

五霸

窈窕

孟母姓仉

放生

韓縝不識女字

漢祀以鴟易鳬

望帝化鶲

癡了

顏子安貧

古人辭大

伯仲塙荒

蘇武娶胡婦

徐庶歸曹

北音無入聲

經濟

漢唐二高識度

巫覡惑人

生煙

蔓字

籌林葛

泰山神祠

星命

韓昌黎未見道

洞庭湘妃墓辯

附徐司馬書

石經

賀季貞乞休

卷二

柳子厚非國語

施全

賈誼蘇洵薄德

噴嚏

生乞廣志

荔枝

石炭

介之推燭之武

開脇而產

詩叶管絃

妬婦不可少

莊周鼓盆

四凶

司馬文正海忠介

佛書入中國

殿廷植花柳

黃冊

尾大不掉

雁足書

羣龍無首

佛不能作福

書啓慎餘字

術者決王荆公去位

易字義

楚子問鼎

漢高后答匈奴書

夥顧沈沈字義

漢書人物表同名

機雲為顧婦贈答

六朝文法不通

雪月二賦

韜畧非呂望筆

明月夜光

珊瑚

輦路

慎子名姓辯

結字即髻字

名字相同

冠服不必反古

袴制

禱夢九鯉湖

延篤桂名常侍碑陰

坡公論畫竹

坡公詩文

佛字辨

瘧病聖人

大麓辨

經與傳各行

三字名辨

論語微子第

二王名字之謬

針砭藥餌

寇菜奢儉不同

觔斗

劉表工書

有餘不足

水銀

焦仲卿妻

夏世最文

字學之難

班固賦用騶虞

翡翠屑金

服玉屑

西方聖人辯

齊鎛鐘銘

鶴鶩

花蕊夫人

卷三

八分隸楷辨

丘明非姓左

蚩尾誤作鴟

障車文

射策之制

烏鬼之辨

晁無咎能畫

韓昌黎白太傅皆惑於服食

男女兩體

詠花不語

滕王蛱蝶圖

婦人自稱

瓊奴

宋紙背面皆可書

衡術

骨肉相關

給事中不宜稱黃門

二千石

五星聚

婦人以父姓為名

七均七始

雲南荔枝

習流

文正美謚

石奴

茶用鹽薑

白牯青奴

秦法棄灰

臧文仲

至老稱詩

樂府訛缺

官吏不得受監臨飲食

婦人裸撲為戲

司馬光辭知制誥

陰陽地理之說

餐菊

蘇子由制策差錯

死而尸溫

古章奏皆手書

黃六

宗藩之盛

燕脂

粉

姐已

火浣布

太玄潛虛

楊用修妄改杜詩

象

天地止有三行

衣冠以白為忌

海月

詩文必有所本

餘甘子

七七

卷四

圖書生剋

雲列祀典

附徐司馬議

拜帖不古

東坡前定

佛經不真

通家之稱

莫愁

李至有功名教

假葬

建文還京

壇熙之始

地下有世界

周禮太司樂辨

附徐司馬議

帝王簪珠翠

禡杌

雞口牛後之誤

晏安鴉毒之誤

齧削雕字

害養花木

蕊苓字相通

治亂甘苦黑白

介雞

鬱鬯之辨

鶴字辨

無廉耻做得尚書

孔子采詩不及楚

三十六奉朝請

詞人用事

惡獸為名

佛不度女人

上林羽獵二賦

風流罪過

佛經恐非西來大意

仙書皆偽筆

仙宦非共途

陶淵明乞食

道學可護短

姜維母書

天問可疑

元微之詩

元白皆無兒

九歌

禹娶四日即治水

荆公不事修飾

古今兩羿

西北水田

詩文顯白古與

古無騎字

露觴廟辯

儒釋不必相援

宋玉招䰟

二王書法

丙午丁未

老於宦途不能自引

卷五

蒼梧寄生酒

螬可療目

朱考亭妄評杜詩

阮宣子歛錢為婿

帝王謚號

元俗近古

以詩句定人品

滁地為南北要地

樂律不講

國初乘驢

詩法

淫亂之始

婦女遭亂

王導遺誅

陶侃被誣

青紙詔

祿命家言

司馬遷論五音

改元

州里難行

漢昭烈顧命

更漏

學官

邵堯夫不娶

險字押韻

世宗崇道教

晉八伯

燈夕

蘇東坡寓惠

韓昌黎登華山

戴逵阮瞻

邊韶

孫叔敖

寒食

上墓設烏飯

生兒詩

以行呼

社稷

二氏

太監雲竒

女兒把子

諸葛入蜀

疑馮宿代韓昌黎筆

觀日出入

東漢碑文

篆體

獸名窮奇

繡襦傳奇

古裝書法

秦始皇年歲

婦人不宜稱姬

五刑

張德釗書石本孝經

生而有文在手

戒曠

受財產

玉牒

火葬

革鱸

牛頭阿旁

鉅靈

皇帝王

梅竹宜瘠地

藥樹監搜

佛書可疑

漢闕之誤

姻繆

珠池

烏寶

石有生長

子孫用祖宗樂

骨董

拾青紫

種竹

持齋

卷六

茶

林逋

樂府之誤

書簡用死罪

張楚

王弼註利貞

孔子責冉求

王道王路

夷齊不食周粟

解易

伯益之壽

堯舜被誣

鼻天子冢

張生夢舜

儒釋相通

九言詩

司馬溫公之貧

琴辨

九河考

龍涎香

漢碑

柴桑

荔枝

消摩

擊壤

以糟飼馬

家里

五大夫松

芍藥握手

千文

蘭香

東方朔滑稽

木棉

朱提銀

蜀漢不制樂

分野

古樂之亡

無逸之誤

周武王十三年伐紂

河清酒

在田之義

古祀必卜

人奴

不庭

星隕如雨

燒酒汎荔枝

龍蛇歌

爛柯

盜跖

今隸

藥箭

弱翰

馬汗血

水利

鱷魚

吳復古

漢劉熊碑

夷齊考

孔子姓氏

癰疽瘡環

王荆公不知詩

精舍

老人子無影

卷七

纂修恩賞

看畫時知孤寒

驢牽船

醴

龍無髓

不信夷齊扣馬

穎師彈琴詩

齊燕

婦人在軍中

磁器

視草之義

眼鏡

不合時宜

皮船祿夭

絹易虜首

王勃千歲歷

赫胥氏

曷字辨

李虛中以疽死

九還

天門開

在齊聞韶

孔子不言樂

譜系之學

封禪

能耐通

老始學詩

禮部韻

易有小石

五經皆有韻

四民

古琴

火鈴

祀孔子之始

曾點鼓瑟

乞燔

石介七十喪未葬

帝王之後皆蠻夷

文天祥考

宮詞

禹錫玄圭

郭公

顏謝優劣

漢高祖尊母不尊父

九州考

誅少正卯

郭汾陽二十四考辨

薛居正子婦

漢書古本

墨

璽印

不施其親

商之後獨盛於夏周

几

黃山谷不言命

梧桐自生

書經今文古文

折字法

石介不能書

疑耀原序

萬曆己亥歲卓吾先生藏書出一時士大夫翕然醉心
無論通邑大都即窮鄉僻壤凡搢觚染翰之流靡不爭
構殆急于水火菽粟也已既而焚書說書易因諸刻種
種漸次播傳海內愈出愈奇不啻長安紙貴僉謂先生
著述無遺矣曩余在青衿時嚮慕先生當代羽儀負笈
數千里修謁先生之門庶幾幸拾咳唾不謂甫再見遂
倒中郎之屣及侍函丈有日廼裒一編見示屬以訂正

初矍然懼既躍然喜私念曰余果有當于先生者耶及
門者多矣胡不他屬而我屬也再拜而受至于莊誦竟
業廻見上遡黃虞近該昭代大而經史細及裨官四始
之宗三倉之學禮樂畢踪經綸咸貫拯二氏之沈冥覺
九流之迷妄名物辨其異同輿論正其毀譽攬獨得之
見決千載之疑猗歟盛哉所謂探臍索隱窮理盡性無
過是編矣卷心七篇倣子輿氏題曰疑耀若以莊叟自
居此先生之謙也余向以為枕中之寶然輕傳之而終

秘之均非先生授書意也戊申歲余叨以地官分務吳會視事之暇檢之笥中登梓以廣其傳余知是編之行也王充之論衡讓其確應劭之風俗通讓其典班固之白虎通讓其辨蔡邕之獨斷讓其闕其他諸子瑣猥勦襲徒足以騁談資于實際蓋茫然已豈能窺先生之藩籬耶雖然非特超軼古人已也即先生藏書諸集或專揚確古今或專研精訓詁至求上下骨徹天人會通亦當以是編為首出云張萱序

欽定四庫全書

疑耀卷一

明 張萱 撰

孔子無鬚眉辨

先聖生有異質凡四十九表長弘之所談姑布子卿之所稱老萊弟子之所識荀卿司馬遷之所述亦云備矣獨未及古者舌內藏不得稱表也緯書所載古理七重又鈞文在手共四十九表其言互異至鬚與眉則載記

皆未之及惟祖庭纂要謂孔子眉有十二采孔叢子述予思之言乃曰先君生無鬚眉天下王侯不以此損其敬何燕泉亦信然其說謂先聖委無鬚眉今世所傳先聖之像頷頰間鬚髯甚盛謂皆吳道玄誤筆也第今闕里有先聖行教小圖又一如吳道玄筆豈先聖後人所傳亦可云誤筆耶余按左氏傳魯昭公七年孟僖子病命其子學禮於孔子其言曰聖人有明德者若不當世其後必有達人今其將在孔丘乎孔子生魯襄公二十

一年至是年僅十有七耳其為當時尊敬如此故孔叢子所云者謂先聖雖少年未有眉鬚時天下王侯亦皆起敬不敢以為稚幼而狎之非真謂果無眉鬚也按方言東齊謂老曰眉此言無鬚眉者猶云未鬚而老也若作眉毛之眉則誤矣夫無鬚尚可信至於無眉亦可信乎

舜有兄妹

舜弟曰象或云隨母嫁瞽瞍者未知是否然人皆知舜

有弟象而不知其有兄與妹也尸子曰舜事親養兄為天下法是舜有兄但逸其名耳許氏說文畫螺舜妹螺或作媯史正義作顆又作繫畫始於螺故曰畫螺列女傳舜女弟繫與二嫂諧是也故或云瞽瞍與象欲殺舜其妹螺每為之解故舜得免但不知其與舜同母否又按世本曰黃帝之臣史皇善圖畫則畫又非始于舜妹矣事物紀原引周穆王傳穆王時其臣封膜始作畫者誤也唐張彥遠歷代名畫記郭若虛圖畫見聞志鄧

椿畫記又畫紀補遺陳德輝續畫紀米芾畫史湯君載
畫鑒夏文彥畫評諸書皆詳畫所自始然亦皆止言有
虞作畫而不知作畫者舜妹媯也故詳著之

生子無功

晉元帝生子普賜羣臣殷羨謝曰臣無勲猥蒙頒眷帝
笑曰此事豈可使卿有勲若溪漁隱又載南唐時宮中
賜洗兒果有近臣謝表云猥蒙寵數深媯無功李主曰
此事卿安得有功何前後人之紕繆相合如此

妓童

司馬溫公家一僕三十年止稱君實許魯齋在中書日
欲買一僕牙儈以能應對嫋禮節者進輒謝去最後得
蓬首垢面愚駢者乃用之或詰其故許曰聰明過我我
反為其所使矣旨哉斯言余見衣冠家畜妓童如龍陽
秦宮輩非惟能役使主人且往往能滋物議乃知魯齋
之言非欺我也余性絕不喜此輩交遊中嘗以為訝余
曰許魯齋聰明人尚恐為奴僕聰明者所役余愚駢人

也能堪其役使乎

誤躬作弓

漢陳寔字仲弓余嘗疑之漢人名字皆相合以弓字寔有何意義及讀洪适隸釋載寔壇碑君諱寔字仲躬乃了然始知諸書皆誤作弓第洪氏又謂躬乃借作弓字用又何誤也

書籍板行

上古書籍皆編竹為簡以韋貫之用漆作書簡秦浩重

不便提挈自有製紙筆及墨者乃易去竹簡誠為便易
然皆寫本亦未有刻板印行也後唐明宗長興二年宰
相馮道李愚請令刊國子監田敏校正九經又母昭裔
貧時嘗借文選於交遊其人有難色昭裔發憤曰異日
若貴當版鏤之以遺學者後仕孟蜀為宰相遂踐其言
又以石鏤九經於成都是印行書籍始之者後唐繼之
者孟蜀也葉夢得曰書籍未印行之先人以藏書為貴
書雖不多而藏者精於讐對故往往皆有善本學者以

傳錄之難故誦讀亦精詳蘇東坡作李公擇山房藏書
記亦謂少時嘗見前輩欲求史記漢書不可得幸得之
皆手自書日夜誦讀惟恐不及近市人轉相摹刻諸子
百家之書日傳萬紙學者於書既多且易致如此其文
辭學術當倍蓰昔人而今乃不然者豈非多而難精耶
二公之言誠中時弊

高皇帝像

先大夫令滇時從黔國邸中模高皇御容龍形虬髯左

臉有十二黑子其狀甚奇與世俗所傳相同似為真矣
余直西省始得內府所藏高成二祖御容高皇帝乃美
丈夫也鬚髯皆如銀絲可數不甚修無所謂龍形虬髯
十二黑子也成祖則有豹額環眼之狀若聳其肩兩鬚
橫分鬚長舉臍皆翼善冠衣綠不正立頗與二后若相
對意至二后則以紙蒙之不敢啟云

許由

張茂先博物志稱司馬遷云無堯讓許由事揚子雲亦

云誇大者為之高士傳堯召許由為九州長則知莊周謂堯以天下讓者乃文飾過當耳而雄遂以為全無許由故楊誠齋有詩云子雲到老不曉事不信人間有許由余謂雄非不信有許由也許由當堯之時尚不屑為九州長而楊雄當王莽之時乃以莽大夫終其不信有許由也欲以自掩也

五霸

霸之有五春秋傳皆謂齊桓晉文秦穆宋襄楚莊而孟

子止言齊桓晉文不言其三故有以宋襄何足言霸秦穆楚莊本皆夷狄皆不足稱霸而以夏之昆吾商之大彭豕韋與齊桓晉文為五者何燕泉亦從其說余謂不然孟子曰五霸者三王之罪人也昆吾大彭豕韋亦皆三王之罪人乎五霸之名當以春秋為正

窈窕

窈窕二字說文解窈深也窕極深也窈窕幽閒之地也詩稱窈窕淑女鄭玄箋為幽閒深宮貞專之善女楊子

方言以美心為窈美容為窕故朱子訓詩以窈窕為德
楊用修深辨之歷引漢魏詩賦所用窈窕字皆屬居處
遂以朱氏之訓為謬余謂不然窈窕原有二義詩之窈
窕淑女即以居處與容德並解不兩妨也

孟母姓仉

孟母三遷其母之姓世莫知者母姓仉音掌齊後也晉
有卿琊掌同前涼掌祿宋有掌禹錫修本草者即同孟
母仉姓仉掌通用字書反爪為掌

放生

浮圖氏謂殺生者有罪放生者獲福夫佃漁罟網始自庖犧若如浮圖之言則聖人庖犧當為地下罪人矣此歐陽永叔之言誠足以破世人之惑第仁人君子存心誠有聞其聲不忍食其肉者孟軻氏所稱君子遠庖厨此語得之又安問罪與福哉

韓縝不識女字

與俗人書劄不可用古字多有不解者宋韓莊敏縝字

玉汝初求字於歐陽文忠公。公書玉女二字與之。莊敏
不樂及見，殊有愠容。文忠曰：此文字古書原無點水。君
何怪耶？乃取筆添女子字傍三點水，始相與大笑。莊敏韓
忠獻公億之子，豈俗人者，亦不解古字如此。

漢祀以鶩易鳬

武帝祭宗廟以鶩當鳬，董仲舒不可謂名實不相應。鳬
非難得之物，鶩與鳬大小相當，以鶩易鳬想必有說矣。
之博古者

皇帝化鵠

子規子雋杜鵠杜宇又名規又曰周鶩又曰催歸又曰
秭規皆一鳥也來敏本蜀論有云荆人鼈令死其戶隨
水上荆人求之不得至汶山下復生起見望帝立以為
相許慎註說文云蜀王望帝淫其相妻以慙死化為子
雋鳥李義山詩曰望帝春心託杜鵠余按常璩華陽國
志杜宇稱帝會有水災其相開明決玉壘山以除害帝
遂委以政事升西山隱焉時適二月子鵠鳥鳴故蜀人

每聞子鵠輒悲而思之是子鵠之鳥非望帝所化明甚
癡了

晉楊濟嘗與傅咸書有云生子癡了官事官事未易了
也了事正作癡夫癡之一字豈但了官事而已人能解得
此癡字則人間世無一不了了矣

顏子安貧

古之安貧者如黔婁原思榮公東郭皆其難者然惟顏
回最著而古傳記所稱回有田二頃此亦足以具饘粥

矣何至簞瓢陋巷而屢空耶無亦回之好學不求安飽故孔子亟稱之遂以安貧之名獨著於後世耳韓昌黎謂簞瓢陋巷乃哲人之細事又何怪其羨二鳥之光榮歎一飽之無時也

古人辭大

晉周處嘗為廣漢太守以母老罷歸尋除楚內史未之官徵拜散騎常侍處曰古人辭大不辭小乃先之楚而後就徵今之仕宦每有左遷或降調者輒先辭其小心

得其大而後之官與古人異矣

伯仲埙箎

八音皆克諧無有乖戾而不和者巧言喻兄弟之和止以埙箎注疏及朱考亭注嚴氏緝皆未能發其旨余因閱古今樂律諸書乃知七音各自為五聲如宮磬鳴而徵磬和獨埙箎則二器共為一音埙為宮而箎之徵和埙為宮而箎之羽和故曰伯氏吹埙仲氏吹箎伯宮也仲徵也此古人所以喻同氣也其旨微矣嗚呼余有四

弟而同母者三中道見捐門祚衰薄孤墳之奏何以成
音一歎

蘇武娶胡婦

蘇子卿娶胡婦卒蒙後世訾議余竊疑之新安文獻志
載宋建炎中有朱勣者以校尉隨奉使行人在尼堪所
數日便求妻室尼堪喜令於所據內人中自擇勣擇一
最陋者人皆莫曉不半月勣遂逃去人始悟曰求妻所
以固尼堪之心使不疑受其陋者無顧戀也子卿之妻

於胡得無朱勣之見耶第未知此胡婦美陋何如耳或曰胡婦之美無疑不然子卿何丁年奉使皓首始歸耶余為掩口

徐庶歸曹

晉周處為西戎校尉守涪城母妻為苻堅將楊安所獲遂降于安此與徐元直舍劉歸曹同情但處既歸秦屢折辱堅又嘗潛至漢中為堅追獲後遂與堅兄子苞謀襲堅事泄被捷徙太原而卒亦足以明其不事秦矣元

直一歸曹遂安于曹無他自明處以此恨恨

北音無入聲

周德清在元時自謂知音者故嘗著中原音韻今所行洪武正韻多宗之余故有侍兒工琵琶嘗譜太和正音止有平上去三聲而無入聲余竊疑之不知其與周德清之音韻實暗合也德清北人其所著音韻皆北聲故以六為溜以國為鬼謂之中原之音可乎至四聲而闕入聲尤為謬妄聲之有平上去入猶天之有元亨利貞

地之有東南西北也闢一其可乎故余所梓太和正音
譜曰北雅以此

經濟

學者有志用世固當講究經濟然不可以經濟一念先
入其心董子明道不計功正誼不謀利所以為萬世醇
儒也宋仁宗朝胡安定教授湖州至以治事名齋王介
甫作詩以美安定三以先生尊稱之非安定經濟之教
深入其心乎迨熙寧柄國安定歿矣遂行免役青苗市

易首實保馬保甲農田水利則皆其平日聞安定之教以講求者故介甫少嘗見濂溪耻於下問及其為相時濂溪年五十有四張橫渠年五十有一二程年三十有八九介甫皆以為不足與有言其所用之人呂惠卿曾布蔡京蔡卞之徒皆急於經濟者也陸氏之學高於事功陳同父之學專於事功皆為朱考亭所不取其意念深矣

漢唐二高識度

漢高帝初為亭長告歸之田有老人過請飲因相呴后及孝惠帝魯元公主皆大貴及見高帝乃曰鄉者夫人兒女皆以君君相貴不可言高帝謝曰誠如父言不敢忘德唐太宗方四歲有書生謁高祖曰公在相法貴人也然必有貴子及見太宗曰龍鳳之姿天日之表其年弱冠必能濟世安民書生辭去高祖使人追而殺之殺之是也先儒謂其德色如漢高祖者非也何者古今欲為不義求福於非望者多起於佞人之諛詞有以激發

而成之當秦隋將亡之時欲為漢祖唐宗之所為者不知其幾為父老書生之談者亦不知其幾彼父老書生偶驗於二帝耳安知其不以告他人哉以是告他人而不驗者多是激發他人求福非望以陷于禍敗者亦多嗟夫匹夫狂言天下受禍其罪可勝誅哉追而殺之唐高之遠識過漢高萬萬矣史乃謂唐高之追殺書生懼其語泄理亦有之第其意雖私其事則是如以為德色不過女子小人歆慕富貴之心英雄如李而肯遽德色

於偶然之虛譽乎

巫覲惑人

南人信鬼里中有以婦人代神語曰聖即古之巫也亦有男人為之者即古之覲也嘗有婦人喪子往聖男所請問其子聖云子來矣聖乃代其子語云我饑當得母乳此婦人遂開襟出其乳哺之於是聖男就抱此婦人頸哺乳此婦人不覺痛哭而歸語其夫以聖為亡子狀相與神之其夫大怒撻之曰汝子死而問聖聖妄為汝

子而欲乳汝輒開襟出乳乳之設他日汝夫死汝或問聖而聖妾為汝夫欲求汝合汝得無從之乎余聞之不勝抵掌後讀元魏高允傳諫高宗書有言敝俗未改者謂祭必立戶使亡者有憑今魏俗已葬冤人直求貌類者事之如父母燕好如夫妻損敗風俗瀆亂情禮與開襟乳聖為子正同

生烟

劉禹錫竹枝詞瀼西春水縠文生宋人小說以此生字

為生熟之生殊足一笑楊用修亦以為然至引謝朓詩
遠樹暖芊芊生烟紛漠漠又引謝靈運賦云披宿莽以
迷徑覩生烟而知墟此為生烟何者為熟烟耶此三處
生字皆當作生發之生方有意味

蔓字

今南人多用槟榔及蔓然皆不解蔓字劉淵林蜀都賦
注緣木而生其子如桑椹味辛香生巴蜀嶺南即鄭樵
所辨西南夷傳蒟醬曰浮留是也又名扶留徐廣曰木

似穀樹其葉如桑用葉作醬以酢羹蒟亦作枸音矩徐廣注音羹俗呼作羹蓋本於此第今乃藤生非樹生也故蒟醬者以蒟為醬今其制已不可知然亦醬成乃可稱蒟醬若稱蒟即為蒟醬是林可製酒而未製酒之林亦可稱林酒乎又云司馬相如使蜀時求而得之者第今巴蜀絕無此物惟滇中有之其子作穗土人乾之以代其葉殊不類桑椹若產嶺南者又絕不作穗劉淵林云實長二三寸辛似薑不酢小顏云綠木而生二說得

之

鬱林葛

粵中多產葛惟鬱林州所產者知名最久齊武帝作佑
客樂曲被管絃乘龍舟遊江中令榜人皆着鬱林布作
淡黃袴以舞此曲即今之鬱林葛也

泰山神祠

海內神祠惟泰山碧霞元君最盛然世莫詳神所自出
余聞馬端臨通考泰山絕頂故有玉女池池側有玉女

石像泉源壅濁宋真宗登封先營頓置泉忽湧出清泚
可鑑味甚甘美王欽若請浚治之像頗摧折詔易以玉
石既成上與近臣臨觀復磬石為龕祭焉及考李諤瑤
池記謂黃帝建岱岳觀嘗遣女子七人雲冠羽衣奉香
火以迎西崑真人則元君或亦七女中之得道而仙者
織女名天孫而岱岳亦名天孫豈以此邪李白遊泰山
詩五女四五人飄飄下九垓似亦有據是元君在唐已
有之至宋而香火始盛耳

星命

祿命家言其星辰名字皆後人杜撰不足信者熊退叟嘗作命說送術者雲岫有云三代盛時家有受田阡陌未梨蔭耗之星夫何居里有公選科目未興科名科甲之星夫何麗此言真足以祛千古之惑

韓昌黎未見道

昔人謂韓昌黎因文見道余謂昌黎文固自佳而道或未之見無論三上書三及門為有識者所嗤即潮州到

仕謝表更露破綻通篇千餘言無非帖首搖尾乞憐之
態夫東西南北唯君所命何遠何近何美何劣昌黎則
首言潮地遠惡人所不堪毛遂自薦雖五尺之童羞之
昌黎則繼言其學問文章為時輩推許至論述朝廷功
德則古人不讓此時朝廷有何功德足以稱述而昌黎
至欲以封禪泰山歆動人主夫司馬相如何足效也始
以諫佛骨而見斥既欲以請封禪而媒進非兩載人乎
謂之見道誰則信之宋石介獨尊信昌黎嘗著尊韓論

其徂徠集中不一而足且曰吏部不敢名也豈好而知其惡者耶

洞庭湘妃墓辯

按永州志帝舜陵在九疑山一名永陵禮記檀弓舜葬蒼梧之野司馬史記舜南巡崩於蒼梧之野歸葬零陵之九疑又載於家語皇覽竹書世紀岳之洞庭有君山其上為湘妃墓古今相傳為堯之二女以妻舜者舜南巡溺於湘江二妃從征偕溺而死神遊洞庭之湖故湖

有黃陵廟以祀二妃詳具秦博士之對始皇也王逸楚詞亦遂以二妃為湘君與湘夫人而劉向張華酈道元羅含諸人相承為萬世不解之惑及樂正子寰宇記張叔範零陵志楊廷秀揮麈錄吳格甫九疑考古並述之楚靈王作章華之臺壅漢水旋其下以象舜陵而秦皇漢武皆嘗望祀宋置守陵五戶而國朝布在祀典仍建廟簫韶峰下二妃墓在黃陵廟西云乃漢荊州牧劉表所建國朝命有司以六月六日致祭焉余按尚書舜五

月南巡狩至南岳即衡山也是歲八月復西巡狩矣溺死之說謬妄不足辨獨怪孔氏傳舜典陟方註亦曰舜南巡狩死於蒼梧之野而葬焉尤足掩口夫尚書所稱舜陟方乃死是在受終文祖之後而南巡狩則堯未殂落而舜攝政之時安得云舜以南巡狩而死於蒼梧耶但舜葬蒼梧又見禮經與秦博士合夫尚書聖經也禮經則出漢儒之手秦始皇時尚書猶在孔壁中秦博士未之見也豈其時始皇巡狩遍天下百姓疲勞而博士

輩託言舜以巡遊溺死警悟君心耶抑尚書未出而識
緯百家熒惑耳目博士亦妄言傳會故傳禮者又傳會
博士耶或為之說曰古者天子五載一巡狩尚書所載
舜巡狩在攝政時安知受終文祖之後不復巡狩故或
復巡狩而溺死亦未可知耳余曰否否巡狩大典也天
子而溺死大變也受終復巡狩而溺死尚書豈有不明
言以紀之者且舜年二十以孝聞三十堯妻以二女五
十攝行天子事五十八堯崩六十一年踐位故董鼎曰舜

巡四岳朝諸侯封山瀆川考禮正刑沒汲不少暇乃攝政時事至踐位後則惟責成於岳牧九官垂裳恭己而已孔子曰有天下而不與此自舜踐位後言也豈復出而巡狩耶况尚書已明言三十徵庸三十在位五十載陟方乃死是舜之死蓋百一十歲也復巡狩而溺死耶說者又以陟方為巡狩韓退之乃云地傾東南南巡非陟也陟者升也方乃死者釋陟為死也蘇子瞻云陟方猶升遐乃死為章句闕

故汲書紀年帝王

之死皆曰陟書云在位五十載陟者紀舜之崩也何謂
南巡哉他傳又云舜伐苗民崩於蒼梧夫伐苗者禹也
已竄三危矣何得勞無為之舜於耄期之時耶都玄敬
聽雨紀談乃疑舜冢在零陵之九疑而九疑在南岳千
有餘里蒼梧在廣西域內去九疑又數百里書云舜南
巡狩至於南岳豈又幸九疑遂崩而葬其地乎孟子言
舜卒於鳴條鳴條在東方夷服今又不聞有舜陵是玄
敬亦有疑而不能祛者也羅長源曰象封有鼻墓在始

興有鼻者有庫也即今道州九疑之墓或象塚耳不然
商均窔也大荒南經赤水之東蒼梧之野舜子商均所
葬元次山九疑山圖記亦謂商均窔其陰豈商均徙此
因葬之後世遂以為舜陵耶漢章帝時零陵文學奚景
於冷道舜祠下得笙白玉之琯十二枚呂氏春秋戴延
君大戴禮伏子賤尚書大傳許叔重說文應仲遠風俗
通陳晉之樂書范蔚宗后漢書皆言昔西王母獻舜玉
琯注云西王母神也曾伯端集仙錄亦云舜在位西王

母使獻白玉琯以和八風則白玉之琯為舜之寶器明矣胡為乎藏於零陵哉無乃帝舜諸子分封巴陵上虞衡山江華等國各錫寶器如成周錫封之制而商均則得白玉之琯遂傳流零陵耶又按舜陵載在山海經者非一說海內南經蒼梧山帝舜葬其陽又大荒南經帝舜葬于岳山又海北經有舜臺臺即陵也又海內朝鮮記南方蒼梧之泉其中有九疑山舜之所葬在長沙零陵界中夫山海經世稱伯益作而長沙零陵乃秦漢郡

名則知此書多後人附益而九疑舜陵渺不可信矣又
寶牘記云舜葬于蒼梧有鳥自丹州而來吐氣名曰馮
霄能銜土成丘墳舜墓鳥所營也集仙錄又云舜瞑目
端坐乘空而至南方之國其中有九疑山焉歷數既往
歸理茲山真源賦云舜因南巡走馬逐鹿同飛蒼梧莫
知所去王仲任論衡書虛篇云舜葬蒼梧象為之耕四
說尤妄誕不足辯故朱晦菴粵西舜祠記業已疑之曰
舜死蒼梧無明文可據獨朱為之辯耳司馬光有詩虞

舜在僕勤薦禹為天子豈有復巡狩過迢渡湘水似為
得之是舜之不死于南巡狩與不葬蒼梧明甚彼洞庭
又安得有二妃墓哉嗟嗟禮有三不吊水其一也以大
聖人而誣以不吊之災萬世下卒未有辯白之者不亦
悲乎若山海經云洞庭之山帝之二女居之然亦曰帝
之二女而已未嘗明言誰之女也豈以堯典有二女之
文遂以洞庭二女即堯典之二女耶郭璞稍晰其妄曰
湘君湘夫人自是二神且既謂之堯女安得復稱湘君

因引禮記舜葬蒼梧二妃不從此亦足為考古一快獨
惜舜不葬於蒼梧璞亦未之辯也羅長源復曰虞舜晚
年已禪禹矣南狩之舉總之伯禹則二妃必不從舜于
蒼梧沈存中繼其說亦云舜陟方之時二妃皆百餘歲
豈宜復稱女信若二說是舜且未嘗南巡狩則尚書亦
不足據美景純又云即令二女從舜其靈達鑒通無方
尚能鳥工龍裳救井廩之難豈不能自免風波况二女
乃帝舜之配不應降附小水為夫人故當以此二女為

天地之女夫鳥工龍裳乃迂怪之談既不足據而帝妃不可降於洞庭小水為夫人天地之女又可降于小水為夫人乎此王逸韓愈所以力辯之似得其情也羅長源又為之說此二女者當為舜之第三妃癸比氏所生者是舜之二女也一曰宵明一曰燭光其說亦有所倣山海經有言舜妻癸比氏所生二女處河大澤其靈能照百里然亦未明言處于洞庭也長源又豈以河大澤可為洞庭也耶陳士元心叔亦該博者其江漢叢談乃

謂湘祠為舜之二女黃陵墓為癸比氏所葬而以山海經之言為實至引陸士規黃陵廟詩帝子不知春可去亂山無主鵲鴟啼帝子者謂舜女也此又信山海經之過也余按竹書紀年舜即位三十年而后育卒后育者娥皇也葬于渭帝王世紀又云舜三妃娥皇無子女英生均舜崩之后曾隨其子徙封于商故曰商均商州有女英塚至唐時盜乃發之今平陽府蒲州南十五里曰蒼陵谷者亦有娥皇女英塚絳州鼓堆祠神為婦人像

祠中石刻亦云舜之二妃夫渭與商與蒲與絳三者必
有一實然皆非楚地則岳之湘妃墓非女英之窆明甚
獨盜所發女英塚乃多得大珠瓊金玉盤又似與茅茨
土階之風不協則不能無疑者竹書云鳴條有蒼梧山
舜崩遂葬焉按今山西平陽府即古河中地解州安邑
縣西北二十里有鳴條崗一名鳴條陌而舜墓具在孟
子曰舜卒于鳴條此萬世不易之定論也鄭康成以鳴
條為南夷地謬之謬矣但古今地理諸志鳴條之地並

無蒼梧之山豈古之河中地或有蒼梧而世代綿邈圖
牒失真寔不可考記禮者或傳會竹書與竹書之或傳
會禮文皆不可知也余謂考古者當以聖經為正信漢
儒不如信吾孟軻氏故舜既葬鳴條則雖南巡矣斷非
崩于蒼梧二妃一葬于渭一葬于商或葬于蒲洞庭湘
妃豈得云舜之二妃楚辭所稱湘君湘夫人信如景純
所核斷非舜妃亦非舜女近代撰楚通志者皆博古君
子也亦未及詳考而是正之故不得不為之辯

附徐司馬鑾書

讀洞庭湘妃辯援引博而彈駁精大快人意今鳴
條岡即在安邑舜陵亦在安邑以孟子卒於鳴條
一言斷之確乎無疑再考竹書紀年舜三十二年
命夏后總師陟方岳三十三年夏后受命神宗三
十五年命夏后征有苗四十九年帝居鳴條五十
年陟此本文也註云鳴條有蒼梧山今海州註係
沈約所述隱侯博而傍涉不盡據經當由檀弓一

語誤之史記及孔氏尚書傳疏皆本檀弓宋孫奭
孟子疏又本史記孫又引書傳云鳴條在安邑之
西而不能深辯今天下稱蒼梧者三粵西蒼梧今
梧州洞庭蒼梧今岳州鮑照賦所謂南馳蒼梧也
九域志東海縣有蒼梧山今海州贛榆縣粵西舜
祠無謂已不待辯洞庭蒼梧之說至今牢不可破
然宋陸均作翼孟己曾疑之困學紀聞引呂氏春秋
秋舜葬於紀以蒼梧山在海州界近古之紀城以

附會於呂覽及竹書注海州之說愚以為此亦穿鑿好異之見耳竹書文最古縱有傳譌亦不出于漢儒之手據尚書五十載陟方乃死似總言舜受禪後遍陟方岳乃崩如竹書三十二年所云紀其大政非必以陟方為舜崩之年也九疑舜墓千古以來孰知其處特衡岳舜所南巡今有舜祠理為近之海州蒼梧山記載幾湮絕無舜墓舜祠遺址豈有帝都冀方而身沒乃葬於海僻一隅苟紀小

國春秋時且為附庸唐虞時當甚荒落帝陟方岳
朝羣后當之名獻通都乃之窮海之濱野死不還
而葬此乎唯孟子卒於鳴條與竹書四十九年帝
居鳴條語合故當以孟子為信矣又有帝王世紀
一說有苗氏叛舜南征崩於鳴條殯以瓦棺葬于
蒼梧九疑山之陽是為零陵謂之紀市此其無端
牽合尤為可笑虞書有苗弗率命禹徂征即在三
十四年禹受命神宗之後與紀年所載無異越十

五年而帝始陟親征而死敢於誕妄瓦棺殯葬乃周人以葬下殤者而以証帝制抑又誕矣禮經蒼梧一語或出漢儒且蒼梧既無定名安知古鳴條之野不有以蒼梧號者山海經云蒼梧山帝舜葬其陽丹朱葬其陰舜以唐封丹朱即今平陽則古蒼梧即鳴條地可為一證如云楚之蒼梧則丹朱亦從舜南巡而葬此耶足下所述已詳已悉因尚有數種姑述所聞以共折時人三尺之喙若舜墓

之說明則湘君湘夫人堯女舜妻之謬不攻自破矣

石經

自有九經以來鐫于石者有十四種而始之者東漢也世鮮有能詳者故論列焉○漢建寧間蔡邕以八分書書石經而其文則諫議大夫馬日磾五官中郎將堂谿典光祿大夫楊賜議郎張馴韓說太史令單飈等奏求校定者也洛陽記曰石經五部碑凡四十六板三行分

樹於太學之前西行周易尚書公羊傳共碑二十八板時十六板存十二板毀南行禮記碑共十五板悉毀然尚有可讀者東行論語三碑而二碑毀矣是蔡邕所書四十六碑此時毀者已十八板而存者尚有二十八板也然亦止周易尚書論語禮記公羊傳丘經而已隋志乃云鐫刻七經皆邕筆豈建寧石經至隋時尚有七而記洛陽者未及見耶七經之外皆不書豈其力有未及耶方仁聲泊宅編石經跋云石經殘碑在洛陽張景元

家世傳蔡中郎書未知何所據而邕所書石經乃八分
仁聲誤以為三體不知三體者乃謝承書也東漢書儒
林傳註熹平四年又詔謝承書五經鐫碑乃古文篆隸
三體其碑高一丈許廣四尺駢羅相列與邕碑不同水
經注又云漢光和六年刻石鏤碑載五經立於講堂前
余按建寧熹平光和皆獻帝年號建寧四年熹平六年
光和六年是十六年之中三書石經矣然熹平石經雖
知為謝承之筆而不知所書為何經光和石經非惟不

知經為何經書為何體即書者亦不知其何人矣豈邕既書七經之外未書者熹平續書之熹平未書者光和續書之耶若然則東漢石經蓋十有七矣夫邕之石經八分也承之石經三體也光和之石經不知其書為何體然三石經想亦不出五與七之外其間必有重書而其文亦必有互異者今三石經皆亡無從考據唐經籍志又有蔡邕金字論語二卷而隋經籍志則一字論語二卷即金字本不言作者姓名後人遂以唐史為誤然

其書久亡亦窮經博古者之一憾也。○魏陳留邯鄲淳嘗書三字石經於漢碑之西亦即漢之三體也然亦未詳其為何經正始中又有一字石經江式曰魏嘗立二字石經其蹟已亡亦皆未詳經為何經筆為何人一字二字之為何體也。○晉裴頠嘗奏修國學刻石寫經。

唐開成元年鄭覃奏言宜準漢舊事鏤石太學示萬世法乃表周墀崔球張次宗孔溫業等是正之凡九經共一百六十卷亦不知為何人書大歷中司業張參又承

詔校定五經鐫石太和七年又勅唐玄度覆定石經并孝經論語爾雅為九經凡一百五十九卷字樣四十卷則開成九經未收孝經論語爾雅而九經者不知何經即太和九經自孝經論語爾雅外其六經者亦不知為何經也但太和字體大乘師法名儒宿學多不窺焉是唐有兩石經也李陽冰又願刻石作篆備書六經後不果其所稱六經豈即周易尚書毛書春秋傳禮記及周禮耶今秘閣所藏有孝經二冊乃唐玄宗八分書天寶

四年國子祭酒李齊古摹勒上石者完好如故益宋搨
也○偽蜀相母昭裔嘗取唐太和本琢石於成都而文
與唐本小異孝經論語爾雅則廣政甲辰張德釗書周
易辛亥楊鈞孫逢吉書尚書周德政書周禮孫明吉書
毛詩禮記儀禮張紹文書公羊穀梁二傳則宋皇祐間
田元均補刻孟子宋宣和間席叔獻補刻皆未著書者
名氏閩統志宋紹興間席益嘗刻禮殿聖賢圖於成都
石經堂豈益即叔獻耶春秋傳亦未知為何人書而於

祥字皆闕其畫此必孟蜀時筆也余幸承乏西省校閱
秘閣藏書及見蜀本石經周易三冊尚書三冊毛詩八
冊左氏春秋三十冊公羊七冊穀梁七冊禮記十四冊
周禮八冊儀禮十冊孝經十冊論語三冊孟子三冊爾
雅三冊完好如故獨左氏春秋未知為何人書其紙墨
之精拓法之妙當是宋物真希世寶也撫玩一月不忍
釋手○宋至和元年命皇姪右屯衛大將軍克繼書石
經又以上所書論語刻石國子仁宗又命以易詩書周


禮禮記春秋孝經作篆隸二體刻石於太學兩楹楊南
仲書周易十書十三詩二十春秋十二禮記二十時與
南仲同書者草澤章友直殿中丞張次立也國子王洙
乃言刻石經已十五年矣止完一孝經耳尚書論語見
書鈔未就乞促限畢工餘經權罷從之紹興十三年内
出御書左氏傳及史記列傳周易令臨安知府張澄刊
石十四年又出御書尚書毛詩十六年又出御書論語
孟子皆刻石立於太學然御書間有困倦輒令憲聖冥

后代書與御書毫不可辯是紹興石經未必皆高宗筆也然趙宋御筆高宗最勝而憲聖能亂其真亦形史中之希有乎第自古鐫石者惟經而紹興獨鐫史記列傳此亦腐史千載特達之知也

賀季真乞休

賀季真乞鑑湖歸老古今以為美談余攷其時年已八十餘矣故其回鄉詩幼小離鄉老大回聲音難改鬢毛衰家童相見不相識却問客從何處來夫仕宦而至八

十餘不歸復何為耶李真嘗謁一賣藥王老問黃白之術持一珠貽之老即以珠易餅共食李真心念寶珠何以易餅口不敢言老曰慳吝未除術何由得是李真者乃貪戀富貴一老悖耳張旭謂賀八真清鑑風流千載人豈別有所據耶若以乞鑑湖歸老時為風流則鑑湖有靈必為吐穢矣因考漢二疏乞身亦皆居閒曹耳若居津要未知能勇退否白居易有詩散員疏去未為貴小邑歸休何足云此足以評二疏矣



疑耀卷一